

欽  
定  
全  
唐  
文

欽定全唐文卷三百三十九目錄

顏真卿 四

左納言史務滋像贊

李侍御寫真贊 并序

蒲塘辨

華嶽廟題名

東林寺題名

西林寺題名

靖居寺題名

天下放生池碑銘

湖州烏程縣杼山妙喜寺碑銘

周太師蜀國公尉遲公廟碑銘

有唐故中大夫使持節壽州諸軍事壽州刺史上

柱國贈太保郭公廟碑銘

并序

東莞臧氏紉宗碑銘

晉侍中右光祿大夫本州大中正西平靖侯顏公

大宗碑

欽定全唐文卷三百三十九

顏真卿四

左納言史務滋像贊

嗚呼人方羅織我獨平反周來之徒殺人以媚人而卒亦不免孔子曰無求生以害仁有殺身以成仁而何嘗親密乎行威闕俊臣慘刻吏桷鑿不相入當年公已矣民到於今稱遺直

李侍御寫真贊并序

前殿中侍御史正議大夫行洛陽縣令隴西李構年三十

七

洛陽精堅強項稱賢粉績圖出風規宛然睟容昭寫卓立  
神全舉板迎揖吾將答焉

蒲塘辨

土俗所呼博淺水浦與敷音轉爾南有博陽山土人呼爲  
濮陽山濮博聲訛水北有歷下村疑古歷陵也

華嶽廟題名

皇唐乾元元年歲次戊戌冬十月戊申眞卿自蒲州刺史  
蒙恩除饒州刺史十有二日辛亥次於華陰與監察御史

王延昌大理評事攝監察御史穆寧評事張澹華陰令劉  
昂主簿鄭鎮同謁金天王之神祠顏真卿題記

東林寺題名

唐永泰丙午歲真卿以罪佐吉州夏六月壬戌與殷亮韋  
桓尼賈鎰同次於東林寺時則同憎熙怡二公惠秀正義  
二律師泉楊鷗在焉仰廬阜之鑪峯想遠公之遺烈升神  
運殿禮僧伽衣觀生法師塵尾扇謝靈運翻涅槃經貝多  
梵夾忻慕之不足聊寫刻於張李二公耶舍禪師之碑側  
魯郡顏真卿書記

西林寺題名

唐永泰丙午歲眞卿以疎拙貶佐吉州夏六月癸亥與殷亮韋桓尼賈鎰楊鸛憩於西林寺有法眞律師深究清淨毗尼之學卽律祖師志恩之上足余內弟正義之阿闍黎也緬懷遠現二公之道烈導余躋重閣示余以張僧繇畫盧舍那佛像泉梁武帝感線繡鉢袋因寓題歐陽公所撰永公碑陰魯郡顏眞卿題

靖居寺題名

唐永泰二年眞卿以罪佐吉州聞青原靖居寺有幽絕之

致御史韓公涉刺史梁公乘嘗見招欲同遊而不果大厯  
二年十月壬寅評事韋甫已使將歸乃與別駕李闕二清  
河房澄同官主簿陸涓甫男七步真卿子姪蔡頓泚頤盱  
等同宿於下方明日及僧明則智清而登禮焉因覩行思  
天師經始雙泉之靈迹道契律師纂成闕路之祕藏徘徊  
瞻仰乃援翰而勒於碑陰

天下放生池碑銘

皇唐七葉我乾元大聖光天文武孝感皇帝陛下以至聖  
之姿屬艱虞之運無少康一旅之衆當祿山強暴之初乾



輦勞謙勵精爲理推誠而萬方胥悅克已而天下歸仁恩  
信侔於四時英威達於八表功庸格天地孝感通神明故  
得回紇奚霫契丹大食盾蠻之屬扶服萬里決命而爭先  
朔方河東平盧河西隴右安西黔中嶺南河南之師虢襪  
五年推鋒而効死摧元惡如拉朽舉兩京若拾遺慶緒遁  
逃已蒙赤族之戮思明跼伏行就沸鼎之誅拯已墜之皇  
綱據再安之宗社迎上皇於西蜀申子道於中京一日三  
朝大明天子之孝問安視膳不改家人之禮蒸蒸然翼翼  
然真帝皇之上儀誥誓所不及已歷選內禪生人以來振

古及隋未有如我皇帝者也而猶姬煦萬類動唉四生乃以乾元二年太歲己亥春三月己丑端命左驍衛右郎將史元琮中使張庭玉奉明詔布德音始於洋州之興道洎山南劔南黔中荆南嶺南江西浙江西諸道訖於昇州之江寧秦淮太平橋臨江帶郭上下五里各置放生池凡八十一所蓋所以宣皇明而廣慈愛也易不云乎信及豚魚書不云乎暨鳥獸魚鼈咸若古之聰明睿智神武而不殺者非陛下而誰昔殷湯克仁猶存一面之網漢武垂惠纔致銜珠之答雖流水救涸寶勝稱名蓋事止於當時尚介

祉於終古豈若我今日動者植者水居陸居舉天下以爲  
池罄域中而蒙福乘陀羅尼加持之力竭煩惱海生死之  
津揆之前古曾何髣髴微臣職忝方面生丁盛美受恩寢  
渎無以上報謹緣皋陶奚斯歌虞頌魯之義述天下放生  
池碑銘一章雖不足形容明聖萬分之一亦臣之精懇也  
敢刻金石著其詞曰

明明皇帝臨下有赫至德光天乾元啟蹟緯武戡亂經文  
御歷孝感神明義形金石仁覆華夏恩加蠻貊道冠巍巍  
威浚號號遘茲多難克廣丕績慶緒致誅思明辟易人道

助順天心惡逆撲滅之期匪朝伊夕乘此寶祚永廣宗祏  
業盛君親功崇列辟交禪之際粲然明白迴映來今孤高  
往策去殺流惠好生立辟率土之濱臨江是宅遂其生性  
庇爾鱗翮環海爲池周天布澤致茲忠厚罔弗怡懌動植  
依仁飛沈受獲流水長者徒稱往昔寶勝如來疇庸允格  
德力無競慈悲孔碩相時傳聞尚賴宏益矧在遭遇其忘  
敷錫眞卿勒銘敢告凡百

湖州烏程縣杼山妙喜寺碑銘

州西南杼山之陽有妙喜寺者梁武帝之所置也大同七

年夏五月帝御壽光閣會所司奏請置額帝以東方有妙  
喜佛國因以名之舊置在州西金斗山唐太宗文皇帝升  
極之六年春二月移於此山山高三百尺週迴一千二百  
步蓋昔夏杼南巡之所今山有夏王村山西北有夏駕山  
皆后杼所幸之地也晉吳興太守張元之吳興疏云烏程  
有墟名東張地形高爽山阜四周卽此山也其山勝絕遊  
者忘歸前代亦名稽留山寺前二十步跨澗有黃浦橋橋  
南五十步又有黃浦亭並宋鮑昭送盛侍郎及庾中郎賦  
詩之所其水自杼山西南五里黃檗山出故號黃浦俗亦

名黃檗澗卽梁光祿卿江淹賦詩之所寺東偏有招隱院  
其前堂西廈謂之溫閣從草堂東南屈曲有懸巖徑行百  
步至吳興太守何楷釣臺西北五十步至避它城按說文  
云它虵也上古患虵而相問得無它乎蓋往古之人築城  
以避它也有處士竟陵子陸羽杼山記所載如此其臺殿  
廊廡建立年代並具於記中大歷七年眞卿蒙刺是邦時  
浙江西觀察判官殿中侍御史袁君高巡部至州會於此  
土眞卿遂立亭於東南陸處士以癸丑歲冬十月癸卯朔  
二十一日癸亥建因名之曰三癸亭西北於藂桂之間創

桂棚左右數百步有芳林茂樹悉產丹青紫三桂而華葉  
各異樹桂之有支徑以袁君步焉因呼爲御史徑真卿自  
典校時卽考五代祖隋外史府君與法言所定切韻引說  
文蒼雅諸字書窮其訓解次以經史子集中兩字已上成  
句者廣而編之故曰韻海以其鏡照原本無所不見故曰  
鏡源天寶末真卿出守平原已與郡人渤海封紹高簣族  
弟今太子通事舍人渾等修之裁成二百卷屬安祿山作  
亂止具四分之一及刺撫州與州人左輔元姜如璧等增  
而廣之成五百卷事物嬰擾未遑刊削大厯壬子歲真卿

叨刺於湖公務之隙乃與金陵沙門法海前殿中侍御史  
李嶸陸羽國子助教州人褚沖評事湯某清河丞太祝柳  
察長城丞潘述縣尉裴循常熟主簿蕭存嘉興尉陸士修  
後進楊遂初崔宏楊德元胡仲南陽湯涉顏祭韋介左興  
宗顏策以季夏於州學及放生池日相討論至冬徙於茲  
山東偏來年春遂終其事前是顏渾正字殷佐明魏縣尉  
劉茂括州錄事參軍盧鶚江寧丞韋寧壽州倉曹朱弁後  
進周愿顏暄沈殷李蕭亦嘗同修未畢各以事去而起居  
郎裴郁祕書郎蔣志評事呂渭魏理沈益劉全白沈仲昌



攝御史陸向沈祖山周閬司議邱悌臨川令沈咸右衛兵  
曹張著兄暮弟薦薦校書郎權器興平丞韋桓尼後進房  
夔崔密崔萬寶叔蒙裴繼姪男超峴愚子頽顧往來登歷  
時杼山大德僧皎然工於文什惠達靈煜味於禪誦相與  
言曰昔廬山東林謝客有遺民之會襄陽南峴羊公流潤  
甫之詞況乎茲山潏潏羣士響集若無記述何以示將來  
乃左顧以求蒙俾記詞而歲事銘曰

夏后南巡山名是因梁王東揆寺勝攸詢形勝天絕規模  
鼎新避它城古垂釣臺堙棚以桂結浦由黃申二庾迢遞

三癸嶙峋徑列御史傳紆逸人紛吾著書羣彥惠臻韻海  
鏡源自秋徂春編同貫魚學比成麟幸託勝引亟倍僧珍  
庶斯見傳金石不泯

周太師蜀國公尉遲公廟碑銘

天臨有周誕赫元輔屏內藩外經文緯武隱若長城闢如  
虓虎功縣日月聲蓋寰宇甥舅之國君親是輔統蜀制梁  
督隴莅茲天命假易奸臣不祇憑陵君德暴茂京師我圖  
匡救三方奮糾綠巾始繫黃龍失守精貫天地義伏羣醜  
節著誠全死而不朽皇唐御歷景命有融賜縑改葬懋烈

金定全唐文卷三十三  
昭忠鄴有賢守是爲張公馨香明德乃建閼宮乃建閼宮  
閼宮有恤乃建豐碑豐碑有崩妖孽遂止幽明載色載穀  
無虧享祀不忒

有唐故中大夫使持節壽州諸軍事壽州刺史上

柱國贈太保郭公廟碑銘

并序

昔申伯翰周降神於維嶽仲父匡晉演慶於筮淮而猶見  
美詩人騰芳史冊豈比夫神明積高之壤百二懸隔之都  
三峯發地而削成九派浮天而噴激炳靈毓粹奕葉生賢  
括宇宙而稟和總河山而蘊秀莫與京者其惟郭宗乎其

先蓋出周之號叔號或爲郭因而氏焉代爲太原著姓漢  
有光祿大夫廣德生孟儒爲馮翊太守子孫始自太原家  
焉後轉徙於華山之下故一族今爲華州鄭縣人夫其築  
臺見師瘞子致養家承金穴之貴政有露冕之高或哲或  
謀或肅或乂皆海有珠而鳥有鳳也閭閻之盛其流益光  
隋有金州司倉諱履球府君懋其德輝不憎下位克已復  
禮州邦化焉篤生唐涼州司法諱昶府君能世其業以伸  
其道遠近宗之不隕厥問生美原縣主簿贈兵部尙書諱  
通府君清識澈照博綜羣言始登王畿鬱有休稱道悠運

促靡及貴仕垂於後昆沒而見尊是生我諱敬之府君府君幼而好仁長有全德身長八尺二寸行中絜矩聲如洪鍾河目電照虬鬚蝟磔進退閒雅望之若神以仲由之政事兼翁歸之文武始自涪州錄事參軍轉瓜州司倉雍北府右果毅加遊擊將軍申王府典軍金吾府折衝兼左衛長上原州別駕遷扶州刺史未上除左威衛左郎將兼監牧南使渭吉二州刺史侍中牛僊客薨君清節奏授綏州遷壽州累加中大夫策勳上柱國以天寶三載春正月十日遘疾終於京師常樂坊之私第春秋七十有八乾元元

年春二月以公之寶允開府儀同三司司徒兼中書令上柱國汾陽郡王曰子儀有大勲於王室乃下詔曰故中大夫壽州刺史郭敬之累君子之行毓達人之德才光文武政美中和生此大賢爲我良弼頃以孽胡稱亂黔首罹殃朕於是鬱興神武之師克掃欃槍之勢而子儀帥彼勁卒赫然先驅取京洛如拾遺翦凶殘猶振槁功存社稷澤潤生人是用寵洽哀榮義申存歿可贈太保於戲體含宏之素履秉冲邈之高烈言必主於忠信行不違於直方清白爲吏者之師死生敦交友之分端一之操不以夷險變其

懷堅明之姿不以雪霜易其令用情不間於疎遠泛愛莫遺於賤貧拳拳服膺終始靡二故所居則化所去見思人到於今稱之斯不朽矣傳曰德盛必百代祀其有後也宜哉恭惟令公先皇之佐命臣也少而美秀長而瓌偉姿性質直天然孝悌寬仁無比騎射絕倫所蒞以清白見稱居常以經濟自命弱冠以邦鄉之賦驟膺將帥之舉四擢高第有聲前朝三爲將軍再守大郡累典兵要必聞休績天寶末安祿山反於范陽令公以節度使擁朔方之衆圍高秀巖於雲中破史思明於嘉山先帝之幸朔方赴行在於

靈武擊同羅於河曲走崔乾祐於蒲坂今上之爲元帥也  
首副旄鉞會回紇於扶風摧凶寇於汶水追餘孽於陝服  
長驅河洛弼成睿圖再造生靈克清天步又函夏之未乂  
安天下之不安一年之間區宇大定丕休哉徒觀其元和  
降精間氣生德感星辰而作輔應期運以濟時忠於國而  
孝於家威可畏而儀可象盛德繫物寬仁厚下用人由已  
從善如流沈謀祕於鬼神精義貫於天地推赤誠而許國  
冒白刃以率先電擊於雲雷之初鷹揚於廟堂之上凡二  
歷鼎司兩升都座四作元帥九年中書歷事二聖而厥德



維懋易相二十而受遇益深蓋尅復上都者再戡定東京者一其餘麾城擗邑得雋摧鋒亦非遽數之所周也信可謂王國虢虎生人廕庥者歟非太保之邁種不孤則何以鍾美若是況乎友于著睦轡龍虎者十人貽厥有光紆青紫者八士勲庸舉集今古莫儔昔奮號尊榮紅粟纔霑於萬石憚家全盛朱輪不出於十人繇我觀之事不侔矣於戲清廟之興所以仁祖考鴻伐之刻亦以垂子孫爰勑制於舊居將永圖而觀德中堂有恤丕構克崇感霜露而怵惕以增敘昭穆而敬恭斯在庶乎觀盟禹若旣無斁於永

懷入室儼然必有覲乎其位哀榮旣極情禮用申仁人之  
所及遠哉孝子之事親終矣豈唯溫溫孔父遠稱讒鼎之  
銘穆穆魯侯獨美龍旂之祀其詞曰

郭之皇祖肇允號土逮於後昆實守左輔徙華陰兮其源一

長流光施於司倉涼州兵部克熾而昌載德浚兮其篤生二

太保允懋厥道神之聽之永錫難老式如金兮其於穆令三

公汾陽啟封文經武緯訓徒陟空簡帝心兮其舍一不二四

格於天地愷悌君子邦之攸陞貊德音兮其芝馥蘭芳羽五

儀公堂子子孫孫爲龍爲光鏘璆琳兮其六乃立新廟肅雍

允劭神保是聽孝思孔炤亶居歆兮其七乃立高碑盛美奚  
斂日月有旣徽猷永垂映來今兮其八

東莞臧氏紉宗碑銘

德有三孝弟稱其至常有五仁道原其終故興化所自則  
曰侯其在矣死喪相恤疇能亦莫吾聞鵲鵲於焉譬急難  
棠棣所以勗跼萼紉宗綏族所貴因之誰其庶乎吾見之  
於臧氏矣爰自伯禽國魯公子氏驅魚賂大諫於僖哀言  
聖兩垂於文武朗陵會吳而滅蜀東郡感張而絕袁建義  
而辭器歸高奮筆而陽秋與直賢明之盛今古莫崇積慶

所鍾克生隋驃騎將軍府君諱滿滿生皇朝通議大夫靈  
州都督府長史府君諱寵寵生銀青光祿大夫銀州刺史  
贈太子少師諱善德咸懷忠良克續徽烈古稱有後今見  
其然少師生三子曰右武衛將軍贈幽州大都督

闕三懷字

慶冠軍左羽林大將軍兼營府都督御史中丞充平盧節  
度採訪兩蕃使懷亮河源軍使安北都護右領軍將軍上  
柱國上蔡縣開國侯累贈太常卿魏州刺史工部尚書懷  
恪皆行冠人倫才兼文武並時迭將爲國虎臣朔漠之間  
峻風斯在其功庸志業各具三原縣先塋神道碑懷慶五

子曰左金吾中郎將范陽節度經略副使希古右威衛將軍中受降城使希真殿中監朔方經略副使希賓原州長史監牧副使希拙銀青北平太守仍充軍使希逸懷亮五子曰勝州都督朔方節度副使敬廉金紫文安太守范陽節度副使希莊左清道率幽州經略副使敬之太常卿特進武州刺史今上元帥都知兵馬使讓之左監門將軍敬此懷恪七子曰右衛中郎將贈闕州刺史希崇豐州別駕贈宋州刺史希昶左驍衛中郎將贈太子賓客希忱忠武將軍贈汝州刺史希愔壯武將軍左威衛中郎將贈祕書

監希景雲麾麟寧三州刺史左金吾將軍左街使贈揚州  
大都督希晏魯國公希讓並稟訓義方丕崇閎閱遭逢明  
盛備展材良能挺號瀾之姿學蘊韜鈴之略糝蘭玉而輝  
映階庭畫隼熊而光聯旗軾勳庸之盛當世無倫源長流  
浚德盛祀遠開元天寶間宗族之紆青紫佐麾幢者已數  
十百人迨乎今上當宁而諸孫冠軍左羽林將軍贈太子  
詹事彥英忠武左清道率瑗左清道率贈少府監彥佺金  
紫太僕卿涉特進殿中監玠左金吾大將軍彥璟正議湖  
州長史隨並不幸早世銀青棣州刺史瑜特進殿中監慈

州刺史瑀特進鴻臚卿均特進太常卿彥昭開府太常卿  
彥嵩正議杭州別駕吳銀青鴻臚少卿渙鴻臚卿蹟朝散  
明州長史叔獻少府監楚卿朝散台州司馬晉卿朝散洋  
州司馬叔雅符寶郎齊卿涇陽縣闕雲卿左金吾衛長卿  
千牛叔卿京兆府參軍叔清闕文

晉侍中右光祿大夫本州大中正西平靖侯顏公

太宗碑

公諱含字宏都瑯琊臨沂人其先出於邾顏公子友封於  
邾是爲小邾子爲魯附庸居於邾邑因以命氏孔門達者

八人曰路回辛驕祖噲僕何次有丁闔叔子率躅秦有芝  
貞漢有肆異安樂魏有斐盛盛字叔臺青徐二州刺史關  
內侯始自魯居瑯琊代傳恭孝故號所居爲孝悌里生欽  
字公若明韓詩禮易尚書多所通說學者宗之歷大中大  
夫東莞廣陵太守葛繹貞子生默字靜伯晉汝陰太守護  
軍將軍生公少有操行以孝聞兄畿咸寧中死託夢當復  
生發棺而氣息甚微闔家營視母妻不能無倦公乃絕棄  
人事躬親侍養足不出戶者十有三年次嫂樊氏失明須  
髯蛇膽尋求不得忽有青衣童子持囊授公乃蛇膽也尋



出戶化成青鳥飛去東海王越以爲太傅參軍元帝過江  
爲丞相祭酒東宮初建公以儒素篤行補太子中庶子遷  
黃門侍郎本州大中正封西平縣侯拜侍中除吳郡太守  
公所歷簡而有思明而能斷然以威風御下王導歎曰顏  
公在事吳人斂手矣未之官復爲侍中國子祭酒光祿勳  
以年老遜位成帝美其素行就加右光祿大夫門施行馬  
賜牀帳被褥救大官四時致膳固辭不受時論者欲爲王  
導降禮馮懷以問於公公曰吾聞伐國不問仁人向馮祖  
思問佞於我我有邪德乎或論少正卯盜跖惡孰浚公曰

隱伏之姦非聖不誅衆咸服焉郭璞嘗欲爲公筮公曰自有性命無勞著龜桓溫求婚以其盛滿不許因誡子孫曰自今任官不可過二千石婚姻勿貪世家或問羣士優劣答曰周伯仁之正鄧伯道之清卞望之之節餘則吾不知致仕二十餘年年九十二薨諡曰靖三子髦謙約並有聲譽公喪在殯而鄰家失火髦與二弟抱柩號叫燦焰垂至忽爾頓絕時人以爲孝感事見晉書髦子君道少纂家業惇於學行儀狀嚴整風貌端美桓公見而歎曰顏侍中廊廟之望也尙書郎國大中正給事黃門侍郎以父老不就

加給事中晉陵臨川太守侍中本州大中正加秩中二千  
石光祿勳西平定侯事具約孫延之集生絢字文和騎都  
尉襲西平侯生靖之字茂宗宣城太守司徒諮議御史中  
丞生騰之字宏道善草隸書有風格治書御史度支校尉  
巴陵太守生炳之字叔豹以能書稱奉朝請輔國江夏王  
參軍生見遠字見遠方正不合於俗梁書云博學有志行  
齊治書御史俄兼中丞正色立朝有當官之稱高祖受禪  
不食發憤慟哭而絕武帝恨之曰我自應天從人何預天  
下人事而顏見遠乃至於此生協字子和湘東王記室梁

書有傳生之推字介北齊中書舍人給事黃門侍郎平原  
太守嘗著觀我生賦云展白下以流漣以靖侯已下七葉  
墳塋皆在故也生思魯愍楚集序思魯自作事見本傳入  
隋生遊秦思魯字孔歸博學善屬文尤工詁訓隋司經校  
書長寧王侍讀東宮學士嘗與劉臻講論經義臻屈服焉  
高祖入關率男師古相時勤禮育德奉迎於長春宮授儀  
同秦王記室國史溫大雅傳云大雅在隋與思魯俱在東  
宮弟彥博與愍楚同直內史省彥公與遊秦並典校祕閣  
二家兄弟各爲一時人物之盛少時學業顏氏爲優其後

職位溫氏爲盛勤禮字敬幼而朗悟識量宏遠工於篆籀尤精詁訓祕閣司經史籍多所刊定歷校書郎著作郎與兄師古相時俱以文學爲崇賢宏文館學士太宗使蕭鈞讚曰依仁服義懷文守一履道自居下幃終日德彰素里行成蘭室鶴鑰馳譽龍樓委質終著作郎生昭甫字周卿少聰穎而善工篆隸草書與內弟殷仲容齊名而勁利過之特爲伯父師古所賞凡所注釋必令參定焉爲天皇曹王侍讀曹王屬有獻古鼎篆書二十餘字舉朝莫能讀昭甫盡識之贈華州刺史真卿表謝批答曰卿之乃祖嘗爲

碩儒旣高倚相之能遂有臧孫之後不墜其業在卿之門  
二子元孫惟貞元孫字聿修聰銳舉進士考功郎劉奇特  
標榜之歷太子舍人專掌令畫元宗讚之曰孔子亞聖魯  
國稱賢翰墨之妙莫之與先累至滁沂濠三州刺史贈祕  
書監五子春卿明經拔萃蜀縣尉舉茂才偃師丞杲卿字  
昕常山太守祿山反開土門拜衛尉卿兼中丞贈太子太  
保諡曰忠節曜卿工草隸五言以文學直崇文館淄川司  
馬旭卿善草書允山令茂曾篤行頗好詁訓犍爲司馬惟  
貞字叔堅有德行詞學尤善草隸屢登甲科太子文學辭

王友累贈太子少保事具陸據神道碑七子闕疑孝友仁讓專精詩傳杭州參軍允南孝悌聰銳工爲詩判屢入高等與春卿杲卿曜卿同日爲侍郎席建侯所賞歷左補闕時眞卿爲殿中侍御史正至同拱法座蹈舞而衣袂相接者三故允南侍宴詩云誰言百人會兄弟也霑陪累遷司封郎中國子司業金鄉男喬卿仁友精晉史有吏道富平尉眞長清直舉明經幼興仁和有醞藉精班漢左衛率府兵曹眞卿進士校書郎舉文詞秀逸醴泉尉清白名聞長安尉歷三院御史兵部員外郎以平原太守拒祿山凡五

爲侍郎右丞三爲尚書四爲御史大夫七爲刺史二爲節  
度採訪觀察使魯郡公允臧友悌有吏幹制舉縣令宰延  
昌拜監察充郭子儀朔方衣資使遷殿中太子中允江陵  
少尹再兼侍御史充荆南節度行軍司馬公子謙安城太  
守約零陵太守孫綸廷尉熙散騎常侍顯護軍司馬曾孫  
系之益州刺史延之金紫光祿大夫劭之領軍司馬根晉  
安太守元孫希之新安太守師伯僕射師仲中書郎浚吏  
部尚書測臨淮太守彝五兵尚書微之散騎常侍僧度給  
事中僧超徐州刺史來孫幼明征虜記室昆孫積中書郎



翻廣州刺史仍孫誓交州刺史挺山陽太守雲孫之儀周  
御正中大夫新野公之善隋葉令侍讀十代孫昶寧仁令  
愍楚侍御史遊秦度支郎中廉州刺史見循吏傳著班漢  
決疑頤隋汝南侯侍讀十一代孫千里工書殷王主簿師  
古祕書監宏文崇賢學士相時禮部侍郎天冊學士育德  
太子通事舍人司經局校定經史利仁祕書郎有意沔州  
刺史博古博學延陵丞十二代孫中和渝州刺史揚庭蔣  
王侍讀光庭博學注後漢書涉令趨庭職方郎中吉州刺  
史欣期著作郎益期詳正學士敬仲仁孝吏部郎中平昌

男康成進士太子舍人崇文館學士希莊進士銀青和州  
刺史日損應制高第大基尉嘉賓少有俊才十三代孫大  
智并州錄事參軍隱朝進士拔萃河北尉匡朝工五言胸  
山令元淑鄰幾景靈並校書郎同寅明經昇庠有詞學富  
陽令恭敏有德行明漢書武功尉知微制舉伊闕丞十四  
代孫溫之有志行舉方正司門郎中澂之澹之並明經晃  
有清節饒陽司士抱范縣尉允濟好屬文榆次尉振高陵  
丞摺援挺據揆撰並明經挺有詞理萬年尉式宣清修進  
士殿中侍御史茂齊淳謹漢州司法舒俊才制舉長安尉

說明經有才器渭南丞順孝悌進士評事勝進士左補闕  
怡好爲詩渾博涉有文太子通事舍人方僑進士宮門丞  
十五代孫逸好文武康令鱗長安尉廣成將軍泉明孝義  
佐父開土門彭州司馬季明子幹詡沛頗及外孫沈盈盧  
遜祿山反死難並贈五品官翻敦敏通義令覲綿州參軍  
顯西令慈明都水潁河南府功曹校書郎頤孝明經大理  
司直頤奉禮郎頤江陵頤河中顥鳳翔參軍頤當陽主簿  
願千牛頂武功丞頗工隸書太子洗馬頤顥並京兆參軍  
顥峴頤顥頤顥顥盈枝並未仕通明項城尉韶有才氣工

詩策進士濮陽尉明華陽尉啓溫江尉襲華陰尉亞邱守  
道不仕其餘枝派繁衍不可具載於戲吾祖以志行純粹  
感通神明貽謀子孫奕葉無改其後忠義孝悌文學才業  
布在青史粲然可知非夫德盛流光何能若是真卿小子  
懼不克荷頃自撫州代到獲展舊山雖碑版沈淪而邱封  
儼在敢揚不朽之烈庶竭罔極之思銘曰

鑠吾祖渡江浦孝通神名軼古凡七葉葬白下本支分源  
流溥世忠義疊規矩翬鸞皇炳龍虎文雖渙學鄒魯赫才  
明振區宇亘今昔難悉數嗟末孫慙下武揚耿光媿無取

豐碑立百世觀

欽定全唐文卷三百四十目錄

顏真卿 五

撫州臨川縣井山華姑仙壇碑銘

有唐茅山元靖先生廣陵李君碑銘

井序

浪跡先生元真子張志和碑銘

唐故通議大夫行薛王友柱國贈祕書少監國子

祭酒太子少保顏君碑銘

晉紫虛元君領上真司命南嶽夫人魏夫人仙壇

碑銘

欽定全唐文卷三百四十

顏真卿

五

撫州臨川縣井山華姑仙壇碑銘

華姑者姓黃氏諱令微撫州臨川人也少乃好道丰神卓異天然絕粒年十二度爲天寶觀女道士年八十髮白面紅如處子狀時人謂之華姑蹠履而行奔馬不及聞魏夫人仙壇在州郭之南草木榛翳結廬求之不得長壽二年歲在壬辰冬十月壬申朔訪於洪州西山胡天師天師名超能役使鬼神見其懇切遙指姑所居南二百步曰烏龜

原中有石龜每蹂踐田苗百姓患之乃擊斷其首卽其處也明日與姑登山顧望西面有池水焉天師謂姑曰池中有所見乎曰無師遂舉左手令姑自腋下觀之四仙浴焉師曰爾有道分必當得之因留與語數日旣還至州虔誠尋訪遂獲石龜於壇中央掘其下得尊像及刀鋸各一油甕五口燈盞數十個天后聞之盡收入內姑嘗於旦夕精思想象之間忽有告曰壇南有九曲池汝可開之姑從而獲焉磚砌盡在他日有異香綵雲從西南而來其夕夢有人謂姑曰井山道場何不修葺姑未及往忽然感疾姑悔



之曰得非違尊教所致乎翌日病愈又聞異香而宿於谷口聞鐘聲遲明入山果獲壇殿池砌餘址半峯有自然石井深可三尺闊丈餘故名井山天欲雨則雲霧先起姑旣置精舍時聞仙梵之音環壇五七里間莫敢樵採姑遂灑掃修葺極其力焉人或不潔不誠必遭蛇虎怪異之警迷不能出矣至今猶然有野鹿爲獵人所射來姑前姑爲拔箭其後每至齋時卽銜蓮藕以獻姑前開元九年欲上昇之際忽謂弟子曰不須釘吾棺可以絳紗冪之數夕有雷震電繞視紗頂孔如雞卵屋穿容人棺中惟覆被木簡而

已弟子奠瓜數日生蔓長數尺結實二顆其大如桃姑同  
學弟子黎瓊仙恆服茯苓胡麻絕粒四十餘秋年八十齒  
髮不衰六七歲時親覩其事每至忌辰卽風雲蓊鬱直入  
室內村野路人往往見綵雲白鶴飛入洞口清齋行道時  
每有一朱鬃白馬在壇側逼之則奔而出外捨之則隨而  
復來靈異昭彰不可談悉仙臺觀道士譚仙巖史元同左  
通元等每至三元恆修齋醮大厯三年真卿獲刺是州明  
年春三月山下有女道士曾妙行夢一女師令上七層華  
樹層層掇食及寤猶飽因是不食嘗於觀中見黎瓊仙跪

而拜曰夢中所見乃尊師也因請依之於今覺韶顏潤澤  
虔修香火於此山遐邇駭慕焉嗚呼麻姑得道於名山南  
真昇仙於龜原華姑鶴翥於茲嶺瓊仙妙行接踵而去非  
夫天地矜嚮從古以然則何以仙氣氤氲若斯盛者真卿  
幸因述職親覩厥猷若默而不言則來者奚述乃爲銘曰  
綽約華姑真仙品徒芳連比色逸俊爭驅南郭從魏西山  
訪胡腋窺仙浴原獲龜烏靈跡旣儼曲池猶污鼎新廟貌  
煥然規模名曰井山終焉不逾鹿來藕獻馬見鬚朱簡解  
空存紗穿上徂奠瓜吐實藹室雲趨妙行精持高真是俞

勒銘翠炎永播元都

有唐茅山元靖先生廣陵李君碑銘

并序

先生姓李氏諱含光廣陵江都人本姓宏以孝敬皇帝廟諱改焉二十一代祖宏江夏太守避王莽徙居晉陵遂爲郡人高祖文嶷陳桂陽王國侍郎曾祖榮皇朝雷州司馬祖師龕隱居以求其志徙於江都父孝威博學好古雅修彭聃之道與天台司馬練師子微爲方外之交尤以篤慎著於州里考行議諡曰正隱先生母瑯琊王氏賢明有德行先生孩提則有殊異晬日獨取孝經如捧讀焉羈州好

靜處誦習墳典年十八志求道妙遂師事同邑李先生遊  
藝數年神龍初以清行度爲道士居龍興觀尤精老莊周  
易之深趣執喪過哀口不嘗甘旨之味食惟穠麥而已封  
植膳羞皆出其手號毀骨立親族莫不傷之開元十七年  
從司馬練師於王屋山傳受大法靈文金記一覽無遺綜  
核古今該明奧旨元宗知先生偏得子微之道乃詔先生  
居王屋山陽臺觀以繼之歲餘請居茅山纂修經法頻徵  
皆謝病不出天寶四載冬乃命中官賁璽書徵之旣至延  
入禁中每欲諮稟必先齋沐他日請傳道法先生辭以足

疾不任科儀者數焉元宗知不可強而止先生嘗以茅山  
靈跡翦焉將墜真經祕籙亦多散落請歸修葺乃特詔於  
楊許舊居紫陽以宅之仍賜絹二百匹法衣兩副香鑪一  
具御製詩及序以餞之又禁於山側採捕魚獵食葷血者  
不得輒入公私祈禱咸絕牲牢先生以六載秋到山是歲  
詔書三至渥澤頻繁暉映崖谷初山中有上清真人許長  
史楊君陶隱居自寫經法歷代傳寶時遭喪亂散逸無遺  
先生捧詔搜求悉備其跡而進上之先時元宗將求大法  
請先生爲師先生竟執謙沖辭疾而退洎七載春元宗又

欲受三洞真經其年春之三月，中官賁璽書云：其月十八日，尅受經誥。是日於大同殿潔修其事，遂遙禮先生爲元師，并賜衣一襲，以伸師資之禮。因以元靖爲先生之嘉號。焉仍詔刻石於華陽洞宮，以誌之。是歲夏五月，隱居先生合丹之所有芝草八十一莖，散生於松石之間。詔俾先生與中官啓告靈仙，緘封表進。夏又詔以紫陽觀側近二百戶太平崇元兩觀各一百戶，並蠲其官徭，以供香火。秋七月，又徵先生旣自請居道觀，以養疾。九載春，辭歸舊山。其年夏六月，前生靈芝之所，又產三百餘莖，煌煌秀異，人所

莫覩先生又圖而奏之是歲冬又徵先生於紫陽別院館  
之十載秋先生又懇辭告老御製序詩以餞之十有一載  
先生奉詔與門人韋景昭等於紫陽之東鬱岡山別建齋  
院立心誠肅是夜仙壇林間徧生甘露因以上聞特詔嘉  
異初隱居先生以三洞真法傳昇元先生昇元付體元先  
生體元付正一先生正一付先生自先生距於隱居凡五  
葉矣皆總襲妙門大正真法所以茅山爲天下道學之所  
宗矣於戲是非可齊也我物均焉生死可忘也覺夢同焉  
如此者何域心於變化之際哉先生以大厯己酉歲冬十



一月十有四日遁化於茅山紫陽之別院春秋八十有七  
其年十二月八日門人赴喪而至者凡數千人號奉冠舄  
遷寔於雷平山之西陲遺命以松棺竹杖木几水瓶香奩  
香鑪置於藏內門弟子等仰奉嘉猷克遵儉德先生識思  
真淳業行高古道窮情性之本學冠天人之際所以優游  
句曲鬱爲王者之師出入明庭特寵肩輿之貴是知順風  
而問昔稱於黃帝望山而請今見於元宗矣又博覽羣言  
長於著撰嘗以本草之書精明藥物事關性命難用因循  
著音義兩卷又以老莊周易爲潔淨之書著學記義略各

三篇內學記二篇以續仙家之遺事皆名實無違詞旨該博初先生幼年頗工篆籀而隸書尤妙客或賞之云賢於其父因投筆不書元宗詔山人王旼強請先生楷書上經一十三紙以備楊許之闕先生能於陰陽術數之道而不以藝業爲能極於轉鍊服食之事而不以壽養爲極但冥懷素樸妙味元津非夫博大之至人孰能盡於此真卿乾元二年以昇州刺史充浙西節度欽承至德結慕元微遂專使致書於茅山以抒誠懇先生特令韋鍊師景昭復書於真卿恩眷綢繆足勵超然之志然宗師可仰望紫府而

非遙王事不遑寄白雲而攸遠洎大厯六年眞卿罷刺臨  
川旋舟建業將宅心小嶺長庇高蹤而轉刺吳興事乖夙  
願徘徊郡邑空懷尊道之心瞻望林巒永負借山之記而  
景昭洎郭閔等以先生茂烈芳猷願銘金石乃邀道士劉  
明素來託斯文眞卿與先生門人中林子殷淑遺名韋渠  
牟嘗接采眞之遊緒聞含一之德敢強名於巷黨曷足辨  
於鴻蒙其詞曰

抱一混茫人之紀綱先生以之氣王神強乃啓元旨元門  
以彰乃爲帝師帝道惟康甘露呈瑞靈芝效祥上士云感

高風載揚鶴返仙廟雲辭帝鄉退歸而老妙識行藏德本  
無累道心有常實曰形解孰云坐忘伐石表墓勒銘傳芳  
谷變陵遷厥跡彌光

浪跡先生元真子張志和碑銘

士有牢籠太虛撒掖元造擺元氣而詞鋒首出軋無間而  
理窟肌分者其惟元真子乎元真子姓張氏本名龜齡東  
陽金華人父遊朝清真好道著南華象罔說十卷又著沖  
虛白馬非馬證八卷代莫知之母留氏夢楓生腹上因而  
誕焉年十六遊太學以明經擢第獻策肅宗浚蒙賞重令

翰林待詔授左金吾衛錄事參軍仍改名志和字子同尋復貶南浦尉經量移不願之任得還本貫旣而親喪無復宦情遂扁舟垂綸浮三江泛五湖自謂烟波釣徒著十二卷凡三萬言號元真子遂以稱焉客或以其文論道縱橫謂之造化鼓吹京兆韋諱爲作內解元真又述太易十五卷凡二百六十有五卦以有無爲宗觀者以爲碧虛金骨兄浦陽尉鶴齡亦有文學恐元真浪跡不還乃於會稽東郭買地結茅齋以居之閉竹門十年不出吏人嘗呼爲掬河夫執畚就役曾無忤色又欲以大布爲褐裘服徐氏聞

之手爲織纊一製十年方暑不解所居草堂椽柱皮節皆存而無斤斧之跡文士效柏梁體作歌者十餘人浙江東觀察使御史大夫陳公少遊聞而謁之坐必終日因表其所居曰元真坊又以門巷湫隘出錢買地以立開閤旌曰迴軒巷仍命評事劉太真爲敘因賦柏梁之什文士詩以美之者十五人旣門隔流水十年無橋陳公遂爲勅造行者謂之大夫橋遂作告大夫橋文以謝之常以豹皮爲屐駿皮爲屨隱素木几酌斑螺盃鳴榔杖拏隨意取適垂釣去餌不在得魚肅宗嘗賜奴婢各一元真配爲夫婦名夫

曰漁僮妻曰樵青人問其故曰漁僮使捧釣收綸蘆中鼓  
枻樵青使蘇蘭薪桂竹裏煎茶竟陵子陸羽校書郎裴修  
嘗詣問有何人往來答曰太虛作室而共居夜月爲燈以  
同照與四海諸公未嘗離別有何往來性好畫山水皆因  
酒酣乘興擊鼓吹笛或閉目或背面舞筆飛墨應節而成  
大厯九年秋八月訊眞卿於湖州前御史李崕以縑帳請  
焉俄揮灑橫掃而纖纈霏拂亂搶而攢毫雷馳須臾之間  
千變萬化蓬壺髣髴而隱見天水微茫而昭合觀者如堵  
轟然愕眙在坐六十餘人元眞命各言爵里紀年名字第

行於其下作兩句題目命酒以蕉葉書之援翰立成潛皆屬對舉席駭歎竟陵子因命畫工圖而次焉真卿以舴艋旣敝請命更之答曰儻惠漁舟願以爲浮家泛宅沿泝江湖之上往來茗甞之間野夫之幸矣其談諧辨捷皆此類也然立性孤竣不可得而親疎率誠澹然人莫窺其喜慍視軒裳如草芥屏嗜欲若泥沙希跡乎大丈夫同合乎古作者莫可測也忽焉去我思德茲深曷以寘懷寄諸他山之石銘曰

邈元真超隱淪齊得喪甘賤貧泛湖海同光塵宅漁舟垂



釣綸輔明主斯若人豈烟波終此身

唐故通議大夫行薛王友柱國贈祕書少監國子

祭酒太子少保顏君碑銘

昔孔悝有彝鼎之銘陸機有祠堂之頌皆所以發揮祖德  
敷演家聲故君子之觀其銘也旣美其所稱又美其所爲  
無而稱之是誣也有而不述豈仁乎論而撰之敢不祇懼  
君諱惟貞字叔堅其先出於顓頊之孫祝融融孫安爲曹  
姓其裔邾武公名夷甫字顏子友別封邠爲小邾子遂以  
顏爲氏多仕魯爲卿大夫孔門達者七十二人顏氏有八

戰國有率觸秦有芝貞漢有異肆安樂其後喪亂譜牒淪  
亡魏有斐盛盛字叔臺青徐二州刺史關內侯始自魯居  
於瑯琊臨沂孝悌里生廣陵太守給事中葛繹貞子諱欽  
字公若精韓詩禮易尚書學者宗之生汝陰太守護軍襲  
葛繹子諱默字靜伯生晉侍中光祿大夫西平靖侯諱含  
字宏都隨元帝過江已下七葉葬在上元幕府山西生侍  
中光祿勳西平定侯諱髦字君道事具孝行傳生州西曹  
騎都尉西平侯諱絳字文和生宣城太守御史中丞諱靖  
之字茂宗生巴陵太守度支校尉諱騰之字宏道善草隸

書有風格梁武帝草書評云顏騰之賀道力並便尺牘少  
行於代生輔國江夏王參軍諱炳之字叔豹以能書稱生  
齊持書御史兼中丞諱見遠字見遠和帝被弑一慟而絕  
梁武深恨之事見梁周北齊書生梁鎮西記室參軍諱協  
字子和感家門事義不求聞達元帝著懷舊詩以傷之撰  
晉仙傳五篇日月災異圖兩卷文集二十卷見梁書生北  
齊給事黃門侍郎待詔文林館平原太守隋東宮學士諱  
之推字介著家訓二十篇冤魂志三卷證俗字音五卷文  
集三十卷事具本傳黃門兄之儀周御正御史中大夫麟

趾學士隋文輔政不署矯詔索璽又拒之出爲集州刺史  
新野公後朝朔望引之御榻曰見危授命臨大節而不可  
奪古人所重何以加卿事具周書弟之善隋葉令子孫見  
於後黃門生皇秦王記室諱思魯愍楚遊秦小記室字孔  
歸君之曾祖也隋司經校書東宮學士率子弟奉迎義旗  
於長春宮招瓜州拜儀同博學善屬文自爲父集序國史  
稱溫大雅在隋與思魯同事東宮彥博與愍楚同直內史  
省彥將時與遊秦同典校祕閣二家兄弟各爲一時人物  
之選少時學業顏氏爲優其後職位溫氏爲盛溫氏譜亦

載焉生勤禮字敬君之祖也幼而朗悟識量宏遠工於篆籀尤精詁訓解褐校書郎與兩兄弟師古相時同時爲宏文崇賢學士弟育德又於司經校定經史當代榮之太宗嘗令師古讚崇賢學士以兄弟特命蕭鈞讚之曰依仁服義懷文守一履道自居下帷終日德彰素里行成蘭室鶴鏘馳譽龍樓委質著作郎修國史夔府長史贈虢州刺史生昭甫敬仲殆庶無恤少連務滋辟強昭甫字周卿君之父也幼而穎悟尤明詁訓工篆籀草隸書與內弟殷仲容齊名而勁利過之特爲伯父師古所賞重每有著述必令

參定嘗得古鼎二十餘字舉朝莫識盡能讀之高宗侍讀  
曹王屬贈華州刺史真卿表謝肅宗批答卿之乃祖當爲  
碩儒旣高倚相之能遂有臧孫之後不墜其業在卿之門  
生我伯父諱元孫臬君伯父聰穎絕倫尤工文翰舉進士  
考功郎劉奇特標榜之由是名動海內累遷太子舍人元  
宗監國專掌令畫嘗和遊苑詩批云孔門稱哲宋室聞賢  
翰墨云捷莫之與先歷滁沂濠三州刺史贈祕書監君仁  
孝友悌少孤育舅殷仲容氏蒙教筆法家貧無紙筆與兄  
以黃土掃壁本石畫而習之故特以草隸擅名天授元年

糊名考試判入高等以親累授衢州參軍與盈川令楊炯  
信安尉桓彥範相得甚歡又選授洛州溫縣永昌二尉每  
選皆判入高科侍郎蘇味道以所試示介衆曰選人中乃  
有如此書判嗟歎久之遂代兄爲長安尉太子文學以清  
白五爲察訪使魏奉古等所薦五邸初開盛選僚屬拜薛  
王友柱國伯姊御史大夫張知泰妻魯郡夫人亡將葬數  
家占君不利臨壙君哭而拒之曰豈有亡手足之痛牽拘  
忌而忍自絕乎弗從其年七月才生明邁疾而歿教義者  
隱而傷焉與會稽賀知章陳郡殷踐猷吳郡陸象先上谷

寇泚河南源光裕博陵崔璩友善事具陸據所撰神道碑  
累贈祕書少監國子祭酒太子少保真卿表謝肅宗批答  
云卿之先人德行優著學精百氏藝絕六書頻擢甲科屢  
升循政曳裾王府名右鄒枚載筆春宮道高徐阮旣而壽  
乖華髮器紆青雲業載史臣慶傳令子追存盛美褒贈崇  
班且旌善於義方俾揚名於有後濠州生春卿杲卿曜卿  
旭卿茂曾春卿工詞翰倜儻有吏才蘇頲舉茂才偃師丞  
杲卿文理清峻所居有聲太常丞攝常山太守祿山反擒  
其心手開土門拜衛尉卿兼中丞城陷杲卿叱詈之遂被



鉤舌支解而終贈太子太保諡曰忠節真卿表謝肅宗批  
答云自羯胡猖狂入我河縣所在官更多受迫脅卿兄以  
人臣大節獨制橫流或俘其謀主或斬其元惡當以救兵  
懸絕身陷賊廷旁若無人歷數其罪手足寄於鋒刃忠義  
形於顏色古所未有朕甚嘉之曜卿工詩書草隸十五以  
文學直崇文館淄川司馬旭卿善草書允山令茂曾好屬  
文詁訓仁厚絕衆健爲司馬君生闕疑允南喬卿真長幼  
與真卿允臧闕疑仁孝有吏能精詩傳善剖判杭州參軍  
允南仁孝有清識工詩人多誦其佳句善草隸與春卿杲

卿曜卿同日於銓庭爲侍郎席建侯所賞達奚珣薦爲左  
補闕真卿時爲殿中正至三拱法座舞蹈而衣袂相接者  
三故允南賦詩云誰言百人會兄弟也霑陪歷殿中膳部  
司封郎中國子司業金鄉男喬卿仁和有吏幹富平尉真  
長清直早世幼輿方雅有醞藉通班漢左清道率府兵曹  
真卿早孤蒙伯父臬允南親自教誨舉進士歷校書制舉  
醴泉尉陟清白長安尉三院御史四爲大夫六爲尚書再  
爲採訪節度充禮儀使光祿大夫魯郡公允臧敦質孝悌  
有吏能制舉延昌令監察充朔方衣資使殿中三爲侍御

史中允江陵少尹荆南行軍濠州及君孫泉明佐父開土  
門彭州司馬威明邛州司馬季明子幹沛翊頗誕及外孫  
博野尉沈盈盧逖並爲逆胡所害各蒙贈五品京官濬好  
屬文翹華正頤慈明都水使者頤好五言校書頤仁孝方  
正明經大理司直嶺南營田判官執喪九日不食頤河陽  
尉頗鳳翔參軍頗工小楷洗馬頗恭仁奉禮郎並早喪逝  
絃方義主簿泉觀並沒蠻襲明微明德明未仕通明獲嘉  
尉將明昌明尉克明崇文明經衛密標榜之翊有德行文  
詞華原主簿準溧水尉觀頗工文襄陽尉觀有文行宏文

進士顥仁友清白常熟令封金鄉男穎清介勤學侍郎蔣  
洌賞其判京兆兵曹襲金鄉男岫仁純常熟主簿任城男  
頎浚儀尉頌清源尉頂幹辦揚府法曹願長厚清白朝邑  
尉頽左率倉曹碩祕書正字頽有吏幹歙州錄事參軍曲  
阜男頎好爲詩富陽尉禹好爲文常州參軍並粗有所立  
君之諸祖父羣從揚庭頤並侍讀強學益期並學士中和  
至誠敬仲大智溫之激之澹之搢挺援撰溫泳陵並明經  
康成強學希莊日損隱朝鄰幾知微舒說順勝式宣韶並  
進士制舉有意中和趨庭希莊至刺史利仁明天文欣期

元淑景靈並校書光庭注後漢書嘉賓千里昇庠匡朝怡  
滔渾允濟摺逸覲不器防有文詞博古少連恭敏惇學行  
敬仲溫之以孝聞潤有風義晃鱗邈迢以清白稱其餘咸  
著官族不獲悉數洪惟累祖之耿光丕業有若子泉宏都  
之德行巴陵記室之書翰特進黃門之文章祕監華州之  
學識肇自魯國格於聖代紛紛盛美遂舉集於君君能述  
遵前人不致失墜其志事以忝聿修宜其克饗尊榮爲清  
廟不祧之主真卿幸承遺訓叨受國恩旣受無疆之祚敢  
揚不朽之烈銘曰

系我宗邾顏公子封鄆魯附庸亞孔聖浴沂風刺青徐給  
事中護管柳渡江楓侍兄疾感蛇童鄰火斷珥貂重施七  
葉傳孝恭武騎都尉司從便尺牘繼魚蟲慟君難憤而終  
咨記室游湘東嗟御正凜移忠泉黃門擅文雄三韶長事  
東宮四穆叔史牢籠褒華州詁訓通小祕監盛名鴻維少  
休文翰工蒞畿赤五襃崇登望苑友桂叢三超贈保儲官  
流光盛廟貌融永不桃垂無窮

晉紫虛元君領上真司命南嶽夫人魏夫人仙壇

碑銘

夫人諱華存字賢安任城人晉司徒劇陽文康公舒之女也師於小有清虛真人王裒裒命中候上仙范邈爲立傳其略云夫人挺瓊蘭之流映體自然之靈璞志逸雲霞明潔鮮蔚天才卓異元標幽拔少讀老莊三傳五經百子無不該覽性樂神仙味真慕道少服胡麻散茯苓丸吐納氣液攝生夷靜親戚往來一無關見常欲別居閒處父母不許年二十四強適太保掾南陽劉君幼彥生二子璞遐幼彥後爲修武令夫人心期幽靈精誠苦盡逮子息粗立乃離隔室宇齋於別寢清修百日忽有太極真人安度明東

華大神方諸青童扶桑碧河湯谷神王景林真人小有仙  
清虛真人王裒來降裒謂夫人曰聞子密緯真氣太帝君  
敕我授子神真之道青童曰清虛爾之師也度明曰子苦  
心求道道今來矣景林曰虛皇鑒爾勤感太極已注子於  
玉札子其勗哉青童又曰子不受聞上道內法晨景玉經  
者仙道無緣得成也後日當會陽洛山中爾勤密之矣王  
君乃命侍女開玉笈出太上寶文八素隱身大洞真經高  
仙羽元等書三十一卷手授夫人焉此皆王君昔遇南極  
夫人西城真人王方平於陽洛山所受之本經也山中有



洞臺是清虛之別宮王君至是北向祝誓於夫人曰太上  
三元九皇高真虛微八道上清玉晨裒爲太帝所敕於魏  
華存王君又說太極白簡青籙金刻玉文有得見此三十  
一卷書者之姓名也凡此寶書起自清虛真人受太師西  
城王君紫元夫人從是當七人得之以白玉爲簡青玉爲  
字至夫人爲四矣於是景林又授夫人黃庭內景經令晝  
夜誦讀萬遍乃得洞觀鬼神此乃不死之道也於是四真  
吟唱各命玉女彈琴擊鼓吹簫合節而發歌歌畢王君乃  
解語夫人向所授書存思指歸寶經節度行事口訣諸要

粗訖徐乃別去凡二夕一日共會在曲靜之中自此之後  
王君及西城真人諸元君夫人互有來往或與隔壁共庭  
初不駭悟已而幼彥以暴疾殞世直天下荒亂夫人撫養  
內外傍救窮乏超羣先覺乃攜細小徑來東南及兒息各  
大並處官位至於守靜之思與日而進也凡在世八十三  
年以成帝咸和九年歲在甲午王君乃與東華青童來降  
與夫人靈藥兩劑使頓服之剋期會於陽洛宮夫人服藥  
稱疾閉目寢息飲而不食七日夜半太乙元仙遣飈車來  
迎夫人用藏景之法託形神劒化成死骸始終外朗仙化

內逸冥變隱適從此而絕子璞時爲庾司空司馬遐時爲  
陶太尉從事中郎安城太守故夫人自此隱化淪景須臾  
至陽洛山明日青童君太極四真人清虛王君三天法師  
張道陵等凡四十七真人降教夫人於隱元之臺王君令  
夫人清齋五百日讀大洞真經并分別登真祕奧道陵授  
以新出明威章奏入靜存祝吏兵符籙之訣衆真各標至  
訓三日而去道陵所以備教委曲者以夫人在世爲女官  
祭酒領職理故也夫人遂修齋讀經誦言萬過積十六年  
顏如少女於是龜山九靈太真西王母金闕聖君南極元

君乃共來迎夫人遂白日昇晨北詣上清宮玉闕之下太微天帝中央王老君三素高元君太上玉晨大道君太素三元君扶桑太帝君金闕後聖君各令使者致命授夫人玉札金文位爲紫虛元君領上真司命南嶽夫人比秩仙公使治天台大霍山洞臺之中主下訓奉道教授當真仙者而男之高仙曰真人女曰元君於是夫人受錫事畢王母及金闕聖君南極元君各去使夫人於王屋小有之中更齋戒三日畢九微元君龜山王母三元夫人馮雙禮珠衆諸衆仙並降夫人於小有清虛上宮絳房之中時夫人

與王君爲賓主焉神肴羅陳金觴四奏各命侍女陳曲成之鈞九雲合節八音零粲於是西王母擊節而歌歌畢馮雙禮珠彈雲璈而答歌餘真人各歌須臾司命神仙請隸屬及南嶽神靈迎官並至虎旗龍輦激曜數百里中西王母諸真乃共與夫人東南行俱詣天台霍山臺又便道過句曲金壇茅叔申宴會二日二夕又共適於霍山夫人安駕玉宇然後各別初王君告夫人曰學者當去疾除病因授甘草丸所謂穀仙方也夫人服之而仙夫人能隸書爲王君立傳事甚詳悉又述青精飴飴註黃庭內景經自後

欽定全唐文

卷三百四十

卷三百四十

三

屢降茅山子璞後至侍中蒙使傳法於司徒瑯琊王舍人  
楊義護軍長史許穆穆子玉斧並昇仙事具陶宏景真誥  
所呼南真卽夫人也初夫人旣渡江徧遊名山至臨川郡  
臨汝水西立壇置精舍院東百餘步造冢壙又於石井山  
建立壇場往來遊憩歲月浚久榛蕪淪翳雖備載圖經而  
略無遺跡有唐女道士黃令微道行高遠八十而有少容  
蹠屣而行奔馬不及時人見其顏色殊異號曰華姑聞夫  
人靈跡長壽二年歲在壬辰冬十月乃訊於洪州西山道  
士胡超超能通神明遙指郭南六里烏龜原有石龜每犯

田苗被人擊首析其處是也姑與道流尋訪見龜在壇中  
央其下得尊像油甕鋸刀燈盞之類俄夢夫人指九曲池  
於壇南獲之磚砌猶在景雲中睿宗使道士葉善信將繡  
像幡花來修法事仍於壇西置洞靈觀度女道士七人開  
元初元宗使醮祭祀禱不絕每有風雨或聞簫管之聲入  
室禮謁必須嚴潔不爾必有虵虎驚吼之異時時有雲如  
烏鳥羣飛垂帶直下壇上倏忽不見西出如向井山前後  
非一已而華姑舂蠶間如有告者曰井山古跡汝須崇建  
俄聞異香從西來姑行宿洞口聞鐘磬之音遲明入山果

遇壇殿餘址遂建立屋宇屢聞仙梵之響環壇數里有採斫及不精潔者必有怪異之警有野鹿中箭來投華姑姑爲拔之後每齋前則銜蓮藕以獻姑開元九年姑欲上昇告弟子曰勿釘吾棺可以絳紗冪之已而雷霆震擊紗上有孔大如雞卵棺中惟有被覆木簡屋上穿可容人座前奠瓜數日生蔓結實如桃者二每至忌辰則風雨鬱勃直入室內元宗聞而駭之覆視明白使道士蔡偉編入後仙傳二十九年春三月乙酉使道士齋龍壁來醺忽有白鹿自壇東出至豕間而滅五色仙蛾集壇上刺史范陽張景



佚以爲聖德感應立碑頌述天寶八載以夫人得道昇仙之所度女道士二人見修香火大厯三年眞卿叨刺是州言崇禮謁郊郭蒙邃萑蒲震驚女弱曹逃豺狼窟聚眞儀如在壇殿巋然瞻仰徘徊悄焉若失有仙壇觀道士譚仙巖者修真自遠法侶是宗請以男官黃道士二七人抽隸洞靈共申灑掃高行女道士黎瓊仙七人萃居壇院精力住持已久率勵往來增修觀宇從之不日適暨厥成仙跡之載崇師之力也敢備其本末而爲頌云銘曰

紫虛元君維魏夫人位列五嶽名高七眞凝華台允奪志

劉嬪太帝昭懇清虛降神羣仙畢會玉笈斯陳服道日損  
精心益勤蛻形神劒託馭飈輪適抵陽洛遄登隱元黃庭  
朗詠白日昇晨西降王母東過叔申傳法侍中許楊爲鄰  
伊昔南渡爰居汝濱壇場處所埋沒荒榛實賴華姑諗於  
胡尊果獲靈跡烏龜之原次尋井山實叶曩言嫣然簡解  
紗冪空存野鹿銜藕靈瓜吐根怪異昭彰不可殫論二聖  
竦駭屢崇明禋于嗟女弱香火堙淪真卿刺州謁拜斯頻  
乃命仙子增修鼎新華姑侍傍異代同塵曷表元德銘功  
翠珉垂諸來裔垓北無垠